

世俗 ê 朋友 kah 淫亂 ê 人

Lín chiah-ê 淫亂 ê 人，lín kám m̄知，kah 世間做朋友就是 kah 上帝做對敵？（《全民台語聖經》雅各書 4：4）

雅各寫 chiah-ê 嚴厲 ê 話，是 beh hō 基督徒，m̄是 hō 異教徒；是 beh hō 去教會 ê 人，m̄是 hō 逃避教會 ê 人。M̄-koh，伊 kā chiah-ê 基督徒 kah 去教會 ê 人叫做「淫亂 ê 人」，為啥物 leh？

真明顯 ê 是，chiah-ê 人決定 beh kā in ê 性命專注 tī 個人 ê 權力、財產、影響力 kah in 家己 ê 幸福。照雅各 ê 評價，這 tòh hō in 成做淫亂 ê 人，因為基督徒是 kah 耶穌基督結婚，耶穌代表天頂 ê 事物，親像公義、和平、事奉、謙遜 kah 慷慨。當信徒 kā in ê 最高忠誠 khng tī 世俗 ê 事物，親像金錢，á 是名聲，á 是權力，á 是權柄，á 是影響力 ê 時，in tòh 變成淫亂 ê 人，因為 in 有背叛 in kah 基督 ê 婚姻關係。

一個 cha-po 基督徒 bē-tàng 結婚以後，koh 無 beh 堅定維持對 in bó 盡忠。伊 bē-tàng 講：「好 lah，我會做到一定程度 ê 盡忠；m̄-koh，若是我 tī 辦公室 á 是 tī 街路 tú-tiòh 別個 cha-bó 人，我全款 kah 意她，á 是 koh khah kah 意她，án-ne 我可能會 kah 她結合。」這真明顯是錯誤 ê；m̄-koh，咱真 chē 人對咱 kah 耶穌 ê 關係 tòh 是 án-ne teh 做。我知我有 án-ne。

咱每一個人必須做 m̄是自然 ê 選擇，來努力對抗咱天生 ài beh 追求世俗吸引咱 ê 物件 ê 傾向；咱顛倒必須努力來 kah 耶穌基督 ê 活命密切結聯做伙。

雅各講 kah hiah-nih 率直，因為伊想 beh hō hiah-ê 自滿 ê 基督徒明白。伊知影 chiah-ê 耶穌 ê 跟 tòe 者會讀 tiòh，á 是聽 tiòh 伊 ê 話，而且伊想 beh 對 in 宣告 in 已經偏離重點。若是咱想講咱做一個平凡 á 是半燒冷 ê 基督徒 tòh ē-sái，án-ne，咱 tòh 是無理解基督徒 ê 意思。半燒冷 ê 基督徒是世俗 ê 親密朋友，he tòh 是為啥物雅各 kā in 叫做淫亂 ê 人。咱 tiòh 來努力避免 hit 種生活！

祈禱：親愛 ê 上主 ah，雅各 ê 話 tiān-tiān 聽起來是 teh 針對個人 koh 是嚴厲 ê，m̄-koh，hiah-ê 話 mā 是有啟發性 ê。我知影伊是 teh 宣講祢 ê 智慧，而且若是我跟 tòe 伊人生 ê 秘訣，án-ne，當我面對困境 ê 時，我會有歡喜 kah 快樂 ê 解決方案。求祢 hō 我勇氣來誠實審視我家己，然後跟 tòe 耶穌基督 bē 有錯誤 ê 引 chhōa。我靠祢 ê 名祈禱。阿們。

(2003.09.28)